

Broj: 03-02-1325/2024
Sarajevo, 19.07.2024. godine

**PARLAMENT FEDERACIJE
BOSNE I HERCEGOVINE**

- **Predstavnički dom -**
gosp. Dragan Mioković, predsjedavajući
- **Dom naroda -**
gosp. Tomislav Martinović, predsjedavajući

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa čl. 191. i 192. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07, 2/08, 26/20 i 13/24) i čl. 186. i 187. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09 i 24/20), **radi razmatranja i usvajanja po hitnom postupku, dostavljam Vam PRIJEDLOG ZAKONA O IZMJENI ZAKONA O UNUTRAŠNJIM POSLOVIMA FEDERACIJE BOSNE I HERCEGOVINE**, koji je utvrdila Vlada Federacije Bosne i Hercegovine na 38. sjednici, održanoj 18.07.2024. godine.

Prijedlog zakona se dostavlja na službenim jezicima i pismima Federacije Bosne i Hercegovine.

S poštovanjem,



Prilog:

- Prijedlog zakona na bosanskom jeziku,
- Odredba Zakona koja se mijenja,
- Obrazac IFP-NE i
- Zakon o unutrašnjim poslovima Federacije Bosne i Hercegovine („Službene novine Federacije BiH“, broj: 81/14)

Co: Federalno ministarstvo unutrašnjih poslova
gosp. Ramo Isak, ministar

Co: predmet

BOSNA I HERCEGOVINA
FEDERACIJA BOSNE I HERCEGOVINE
VLADA

PRIJEDLOG

ZAKON
O IZMJENI ZAKONA O UNUTRAŠNJIM POSLOVIMA
FEDERACIJE BOSNE I HERCEGOVINE

Sarajevo, juli 2024. godine

RAZLOG ZA DONOŠENJE ZAKONA PO HITNOM POSTUPKU

Zakonom o unutrašnjim poslovima Federacije Bosne i Hercegovine („Službene novine Federacije BiH”, broj: 81/14) utvrđeni su uvjeti za imenovanje direktora Federalne uprave policije i zamjenika direktora Federalne uprave policije. Jedan od uvjeta za imenovanje navedenih lica, između ostalog, jeste “da za vrijeme raspisivanja javnog konkursa, kao i za vrijeme trajanja mandata iz člana 48. stav (1) ovog zakona, ne ispunjava uvjete za penzionisanje predviđene zakonom”. Trenutno zbog specifičnosti unapređenja policijskih službenika u više činove, što se vrši samo na upražnjena radna mjesta, i specifične procedure u vezi s unapređenjem, došlo se u situaciju da iz Federalne uprave policije niti jedan policijski službenik koji ima čin glavnog inspektora nema uvjete za prijavljivanje na konkurs za direktora Federalne uprave policije i zamjenika direktora Federalne uprave policije, jer će u vrijeme trajanja mandata ispunjavati uvjete za ostvarivanje prava na penziju u skladu sa Zakonom o penzijskom i invalidskom osiguranju, a prema Zakonu o policijskim službenicima Federacije Bosne i Hercegovine po sistemu automatizma policijskom službeniku prestaje radni odnos.

Također, ukazujemo i na to da je u većini kantonalnih ministarstava unutrašnjih poslova slična ili je ista situacija sa policijskim službenicima koji ispunjavaju uvjete u pogledu čina da mogu biti kandidati za direktora Federalne uprave policije ili zamjenika direktora Federalne uprave policije.

Imajući u vidu navedeno, da trenutno Federalnom upravom policije ne rukovodi direktor ili zamjenik direktora Federalne uprave policije i da će nakon raspisivanja javnog konkursa biti teško osigurati policijskog službenika prema uvjetima utvrđenim u članu 54. Zakona o unutrašnjim poslovima Federacije Bosne i Hercegovine („Službene novine Federacije BiH”, broj: 81/14), neophodno je korigovati navedenu odredbu zakona.

S obzirom na gore navedeno, smatramo da su se stekli uvjeti za donošenje Zakona o izmjeni Zakona o unutrašnjim poslovima Federacije Bosne i Hercegovine po hitnom postupku.

ZAKON
O IZMJENI ZAKONA O UNUTRAŠNJIM POSLOVIMA
FEDERACIJE BOSNE I HERCEGOVINE

Član 1.

U Zakonu o unutrašnjim poslovima Federacije Bosne i Hercegovine („Službene novine Federacije BiH“, broj: 81/14) u članu 54. tačka 8) briše se.

Dosadašnje tač. od 9) do 11) postaju tač. od 8) do 10).

Član 2.

Ovaj zakon stupa na snagu narednog dana od dana objavljivanja u „Službenim novinama Federacije BiH“.

O B R A Z L O Ž E N J E
PRIJEDLOGA ZAKONA O IZMJENI ZAKONA O UNUTRAŠNJIM POSLOVIMA
FEDERACIJE BOSNE I HERCEGOVINE

I - USTAVNI OSNOV

Za donošenje Zakona o izmjeni Zakona o unutrašnjim poslovima Federacije Bosne i Hercegovine postoji ustavni osnov koji je sadržan u odredbi člana IV A. 20. (1) d) Ustava Federacije Bosne i Hercegovine, prema kojoj je Parlament nadležan za donošenje zakona o vršenju dužnosti federalne vlasti. S obzirom na to da se ovim zakonom uređuju unutrašnji poslovi iz nadležnosti Federacije, navedena ustavna odredba predstavlja ustavni osnov za njegovo donošenje.

II - RAZLOG ZA DONOŠENJE ZAKONA

Zakonom o unutrašnjim poslovima Federacije Bosne i Hercegovine („Službene novine Federacije BiH”, broj: 81/14) utvrđeni su uvjeti za imenovanje direktora Federalne uprave policije i zamjenika direktora Federalne uprave policije. Jedan od uvjeta za imenovanje navedenih lica, između ostalog, jeste “da za vrijeme raspisivanja javnog konkursa, kao i za vrijeme trajanja mandata iz člana 48. stav (1) ovog zakona, ne ispunjava uvjete za penzionisanje predviđene zakonom”. Trenutno, zbog specifičnosti unapređenja policijskih službenika u više činove, što se vrši samo za upražnjena radna mjesta, i specifične procedure u vezi s unapređenjem, došlo je do toga da iz Federalne uprave policije niti jedan policijski službenik koji ima čin glavnog inspektora nema uvjete za prijavljivanje na konkurs za direktora Federalne uprave policije i zamjenika direktora Federalne uprave policije, jer će u vrijeme trajanja mandata ispunjavati uvjete za ostvarivanje prava na penziju u skladu sa Zakonom o penzijskom i invalidskom osiguranju, a prema Zakonu o policijskim službenicima Federacije Bosne i Hercegovine po sistemu automatizma policijskom službeniku prestaje radni odnos.

Također, ukazujemo i na to da je i u većini kantonalnih ministarstava unutrašnjih poslova slična ili ista situacija sa policijskim službenicima koji ispunjavaju uvjete u pogledu čina, tj. da mogu biti kandidati za direktora Federalne uprave policije ili zamjenika direktora Federalne uprave policije.

Imajući u vidu navedeno, da trenutno Federalnom upravom policije ne rukovodi direktor ili zamjenika direktora Federalne uprave policije i da će nakon raspisivanja javnog konkursa biti teško osigurati policijskog službenika prema uvjetima utvrđenim u članu 54. Zakona o unutrašnjim poslovima Federacije Bosne i Hercegovine („Službene novine Federacije BiH”, broj: 81/14), neophodno je korigovati navedenu odredbu zakona.

III - OBRAZLOŽENJE PREDLOŽENIH RJEŠENJA

Članom 1. obuhvaćena je izmjena u članu 54. tačka 8) na način da je ista brisana. Navedena odredba se odnosila na to da u vrijeme raspisivanja javnog konkursa i trajanja mandata kandidat za direktora Federalne uprave policije i zamjenika direktora Federalne uprave policije ne ispunjava uvjete za penziju. Ovom izmjenom u članu 54. Zakona su pojednostavljeni uvjeti u pogledu izbora direktora Federalne uprave policije i zamjenika direktora Federalne uprave policije.

U članu 2. propisano je kada Zakon stupa na snagu.

IV - USKLAĐENOST PROPISA S EVROPSKIM ZAKONODAVSTVOM

Federalno ministarstvo unutrašnjih poslova nije moglo utvrditi da postoje primarni i sekundarni izvori prava Evropske unije kojim se na poseban način regulišu pitanja koja su regulisana navedenim zakonom.

V - PROVEDBENI MEHANIZMI I NAČIN OSIGURANJA POŠTIVANJA PROPISA

Provođenje Zakona o izmjeni Zakona o unutrašnjim poslovima Federacije Bosne i Hercegovine u nadležnosti je Federalnog ministarstva unutrašnjih poslova i Federalne uprave policije, jer se predmetni zakon odnosi na pitanja iz djelokruga rada, odnosno rukovođenja Federane uprave policije.

VI - OPIS KONSULTACIJA VOĐENIH U PROCESU IZRADE PROPISA

Imajući u vidu da se radi o pitanjima iz isključive nadležnosti Federalnog ministarstva unutrašnjih poslova, ocijenjeno je da nije potrebno obavljati dodatne konsultacije o pitanjima koja su obuhvaćena Prijedlogom zakona o izmjeni Zakona o unutrašnjim poslovima Federacije Bosne i Hercegovine.

VII - FINANSIJSKA SREDSTVA

Za realizaciju ovog zakona nisu potrebna dodatna finansijska sredstva iz budžeta Federacije Bosne i Hercegovine.

ODREDBA ZAKONA KOJA SE MIJENJA:

Član 54.

(Uvjeti za imenovanje direktora policije)

Kandidat za direktora policije može biti osoba koja ispunjava sljedeće uvjete:

- 1) državljanin je Bosne i Hercegovine;
- 2) ima visoku stručnu spremu najmanje VII. stepena obrazovanja ili završen prvi ciklus visokog obrazovanja sa 240 ECTS bodova ili drugog ili trećeg ciklusa Bolonjskog sistema studiranja;
- 3) zdravstveno je sposoban za obavljanje dužnosti i zadataka;
- 4) ima najmanje tri godine iskustva u činu glavnog inspektora ili višem činu;
- 5) nije mu izrečena krivična sankcija;
- 6) protiv njega nije potvrđena optužnica;
- 7) na njega se ne odnose odredbe člana IX. 1. Ustava Bosne i Hercegovine;
- 8) za vrijeme raspisivanja javnog konkursa, kao i za vrijeme trajanja mandata iz člana 48. stav (1) ovog zakona, ne ispunjava zakonom predviđene uvjete za penzionisanje;
- 9) nije bio član političke stranke niti je bio na bilo kojoj poziciji u političkoj stranci na bilo kojem nivou niti je bio postavljen na bilo koju poziciju u organima vlasti od političke stranke u posljednjih pet godina;
- 10) da nije, niti je bio član izvršnog ili zakonodavnog tijela na bilo kojem nivou vlasti u Bosni i Hercegovini u posljednjih pet godina;
- 11) da nije disciplinski kažnjavao za povrede službene dužnosti, osim lakših povreda službenih dužnosti.